

Ona yurtning - oltin beshiging

TONG yulduzi

№ 12
(66449)

2004 yil
22 - 28 mart

Gazeta 1929 yil
1 avgustdan chiqa
boshlagan

O'zbekiston bolalari
va o'smirlarining gazetasi

Muassislar:

O'ZBEKISTON MATBUOT VA AXBOROT AGENTLIGI,
O'ZBEKISTON RESPUBLIKASI XALQ TA'LIMI VAZIRLIGI,
«KAMOLOT» YOSHLAR IJTIMOY HARAKATI.

MINNATDORLIK TUYG'USI

Har kim o'zining kelajagini aniq tasavvur etishi kerak. Men yashayotgan O'zbekiston mustaqil diyor. Men o'z kelajagimni O'zbekistonsiz tasavvur qila olmayman. Mening hayotimda Vatanimning o'rni qanchalik muhim bo'lsa, O'zbekistonning kelajagida mening ham o'rnim borligidan faxrlanaman. Bu mening qanday bilim olishimga, ilmfan sirlarini qanday egallashimga bog'liq. O'z kelajagini o'ylagan har bir kishi bugun ona tilini mukammal bilishi, shuningdek, xorijiy tilni va kompyuter sirlarini yaxshi egallab olishi kerak. Bugun har kim erkin mehnat qilishi, o'zi xohlagan kasbni egallashi mumkin. Bu mening kelajagimni kafolatlab beradi. Men kelgusida maktabni a'lo baholar bilan bitirib, yaxshi mutaxassis bo'lishga harakat qilaman. Men kelgusida jurnalist yoki tarjimon bo'lmoqchiman. Jurnalist kundalik bo'layotgan voqealarni muntazam kuzatib boradi va odamlarga yetkazadi. Agar tarjimon bo'lsam, boshqa tillarda yozilgan axborotlarni, ma'lumotlarni, uchrashuvlarni o'z ona tilimga o'girib

beraman. Bu bilan boshqa xalqlar tilini, dilini, madaniyatini, tarixini va erishayotgan yutuqlarini o'rganaman va tanishtiraman. Avvallari bunday imkoniyatlar bo'lmagan. Bugun hayot o'zgarmoqda. Biz yoshlar o'qishimiz uchun maktab, kollej, litsey va gimnaziyalarni kompyuterlashtirib, sport zallarini zamonaviy jihozlar bilan ta'minlashmoqda, malaka oshirishimiz uchun chet ellarga o'qishga yuborishyapti.

Burch

Ayni chog'da har birimiz o'z mehnati bilan jonini fido qilib, mamlakatning moddiy va ma'naviy boyliklarini yaratgan kishilarga samimiy minnatdorlik tuyg'ularini his etishimizni juda-juda istar edim.

Kelajak avlodlar bizdan shu o'lka, shu muqaddas zaminni yana ham boy, kuchli va qudratli holda qabul qilib olishlari uchun harakat qilishimiz shart.

Buyuk ajdodlarimizga nisbatan qanday minnatdorchilik tuyg'ularini his etayotgan bo'lsak, kelajak avlodlar ham bizga nisbatan shunday minnatdorchilik tuyg'ularini his etishlari uchun lozim bo'lgan hamma ishni qilish - bizning farzandlik burchimizdir.

Muattar ERGASHEVA,
Toshkent shahar,

To'lqin Jalilov nomli 245-maktab o'quvchisi.

XUSH KELDING, NAVRO'ZIM!



KO'K MOMONING SUYUKLI QIZI

Salom, Navro'z! Dugonajonim, omonmisan? Men seni juda-juda sog'indim. Sen-chi? Sen ham meni sog'ingandirsan-a? Yodingdami, o'tgan ko'klam chog'i qirga yugurib, yalpizginaning bo'ylaridan o'rgilib, ko'zga surtib, ardoqlaganlarimiz? Yangi ochilgan boychechakni birinchi bo'lib ko'rib, momolarimizga suyunchilagan oshiqqanimiz. Ayvon shiftiga ne-ne mashaqqatlar bilan in qurayotgan qaldirg'ochning shijoatiga havas-la boqqanlarimiz. O'shanda buvim boychechakni ko'zlariga surtib, «omonlik, somonlik» deya ko'zlariga yosh olganlarida, hayratdan yelka qisgandik ikkimiz. Bugun esa... Sening iliq nafasing taftini tuygandagina buvimning mijjalarida yilt etgan jola-sog'inch yoshlari ekanini angelayapman. Ariq labida iymajibgina sochlarini tarayotgan majnuntol esingdadir? Sochlarimizga tol bargaklar taqib, lola sayliga borgandik o'shanda. Subhidam totinganim sumalakning mazasi hali hamon og'zimdan ketmaydi.

Dugonajon, yana sening diydoringga yetkazganiga shukr. Senga aytar so'zlarim shunchayin ko'pki... Endi meni tashlab, olislarga ketmaysan-a?..

Sadoqat DADAYEVA, Toshkent viloyati, Parkent tumani.

SHAMOL NEGA ESADI?

Ustoz ijodi

Dadasidan so'rar Hol:
-Nega esadi shamol?
Aying-chi, dada, asli,
Bormi uning foydasi?..

Qara, daraxtlar, gullar,
Bir joydan jilmay turar.
Bunday holatda hech on,
Harakatga yo'q imkon.

Dada javobni bilar,
Zumda nasihat qilar:
-Bilib olgin, bilmasang,
Agar shamol bo'lmasa,

Bo'lsa shamol yoki yel,
Harakatda bo'lar bil...
Harakatda bo'lmasa,
Bilsang, qurir har narsa.

Gulu o'simlik bo'lmas.
Daraxtlar meva qilmas.
Ularga berib «qanot»,
Shamol berar jon, hayot...

Ularga baxsh etib jon,
Esadi shamol har on!

Abdumannon TCSHTEMIROV,
Farg'ona viloyati, Bag'dod tumani,
Bag'dod shaharchasi.

KELINCHAKKA O'XSHAB QOLDI

Hamma joyda bo'lgani kabi bizning maktabimizda ham katta hashar bo'lib o'tdi. Unda yuqori sinf o'quvchilaridan tortib, quyi sinf kichikintoylarigacha ishtirok etishdi. Ustozlarimiz boshchiligida uyushqoqlik bilan o'tgan shanbaligimizda har kimning o'z o'rimi, ulushi bo'ldi. Biz qizlar sinf xonalarimizni tozaladik, oynalarni, partalarni, pardalarni yuvdik. So'ngra, maktab hovlisini supurib qo'ydik. Maktab hovlisidagi bog'imiz va gulzorimizdagi daraxtlarning tagini yumshatish, ortiqcha shox-shabbalardan tozalash, yangi nihollar va gullar ekish ishlari o'g'il bolalarimizdan ortmadi. Barcha ishlarimizni yakunlagach, maktabimizga yana bir nazar tashladim. U ko'zimga orolangan suluv kelinchakdek ko'rinib ketdi.

Siz-chi, aziz do'stlarim, hasharga qanday hissa qo'shdingiz?

Shirin ASILOVA,
Toshkent viloyati, Parkent tumanidagi
1 - maktabning 7 - sinf o'quvchisi.

«QUSHBEGI» DAN XUSHXABAR

Ko'klamning ajib kunlarida poytaxtimizning Yakkasaroy tumaniga qarashli «Qushbegi» mahallasida ham umumxalq hashari ko'tarinki kayfiyat va uyushqoqlik bilan o'tkazildi.

Mahalla nuroniylari tongdagi duolari bilan hasharni boshlab berdilar. Shundan keyin katta-yu kichik barobar ishga qizg'in kirishdilar. Ayniqsa, tumandagi 319-maktabning o'quvchilari mehnatkashliklari bilan hammani quvontirishdi. Hasharda 8000 kishi ishtirok etdi. Shu hududdagi 2 km ga yaqin ariq-zovurlar tozalanib, sport maydonchalari va ko'chalar yanada tartibga keltirildi. 3500 tup atirgul, 2000 tup daraxt ko'chatlari ekilib, atrof obodonlashtirildi.

O'z muxbirimiz

T o s h k e n t
shahridagi 283-
maktabning 7-«B»
sinf o'quvchisi
M a l i k a
K A R I M O V A
chizgan rasmini
«Mening bobom»
deb nomlabdi.



Hashar - bizga yarashar

O'ZBEK POKIZA YASHAR

O'zbek pokiza yashar,
Halol oshini oshar.
Buni biladi bashar,
Yaxshi udumi - hashar.

Mahalla quchog'ida,
Tarbiya o'chog'ida,
Har kun mehnat qaynaydi,
Ayni bahor chog'ida.

Mahalla-ko'ydan qolma,
Yurtning ishidan tolma!
Tashkil qilsang sen hashar,
Keksa-yu yosh qarashar.

O'zbekning ezgu ishi -
Xolis mehnat qilishi.
Deydilar, himmat, hashar,
Elimizga yarashar!

Bahrom TOJIYEV.

TA'TILDA TANTANA

Ta'tilda Tursunoy Toshkentdagi tog'asinikida turdi. Tursunoy tavalludini tog'asinikida tantanaladi. Tursunoyni tabriklagani tanishlari Tamara, Temur, Turg'unoylar to'planishdi. Tanishlari Tursunoyga tuhfa telefon tutishdi. Tog'asi Tursunoyga tilla tusli tufli tutdi. To'planganlar tortga to'yishdi. To'satdan telefon ting'irladi. Tursunoyni telefondan tanishi Tohir tabrikledi. Tohir Tursunoyga tinchlik va to'kinlik tiladi. Tunda Tursunoyning tanishlari tarqalishdi. Tursunoy tavalludini takrorlanmas tarzda tantanaladi.

Nazira QAYIPBERGANOVA,
Qoraqalpog'iston Respublikasi, Xo'jayli tumanidagi
57 - maktabning 10-sinf o'quvchisi.


OTAMNI SOG'INIB

Ko'zimda yosh, siz qaydasiz, otajon,
Sog'inaman chehrangizni men har on.
Mehringizni ayadingiz o'zingiz,
Ravo ko'rmay «qizim» degan so'zingiz.

Men sog'inib yashayapman mehringiz,
Qayladasiz, sog'inyapman otajon.
Sog'inch og'ir azob ekan, bilyapman,
Yuragimga armonlarni solyapman.

Mashhura YO'LDOSHEVA,
Respublika Nafis san'at maktabining
9- sinf o'quvchisi.

ISMOILJONNING BAYRAMLARI



Ismoiljon bog'cha bilan xayrlashib, maktabga chiqqanida, to'g'risi, biroz ranjigandi. Sababi, go'yo onasidek bo'lib qolgan tarbiyachi opalari bilan xayrlashishning o'zi bo'lmagandi. O'shanda uni maktabda ham xuddi bog'cha opalaridek mehribon ustoz Dilovar opa Kamolovanning quchoq ochib kutib olishini, ulardek erkaliklari-yu sho'xliklarini ko'tarib, ta'lim-tarbiya berishini xayoliga ham keltirmagandi-da...

Ismoiljonning Buxoro viloyati, G'ijduvon tumanidagi Fitrat nomli 45 - o'rta maktabning 1 - «A» sinfiga qadam qo'yganiga atigi yarim yil bo'libdi. Shu

fursat ichida uning hayotida qanchadan-qancha bayramlar, quvonchli onlar bo'lib o'tdi. Axir «5» baho olgan har bir kuni, «Ona», «Vatan» kabi so'zlarni mustaqil o'qiy olgan kunlarining bari uning uchun ham, onajoni uchun ham bir bayramda. Yaqinginda «Alifbe», archa bayramlarini tantana qilishgan bo'lsa, kuni kecha onajonlarini sinfga chorlab, ayyomlari bilan qutlashdi. 13-14- mart kunlari o'tkazilgan umumxalq hasharidan ham chetda qolishmadi, qizlar sinf xonalarini tozalab, oynalarni yuvishdi. O'g'il bolalar esa o'zlaridan ham kattaroq belkuraklarni olib, daraxtlarning tagini yumshatish ishlarida yuqori sinfdagi akalariga ko'maklashib yuborishdi. Keyin esa bashang kiyinib, Navro'z bayramini tantana qilishdi. Endi navbat bahorgi ta'tilga!

Nargiza AKBAR qizi.

SHOIRLAR - BOLALARGA

Har kuni muntazam ravishda kitob o'qish bu fikrlash qobiliyatimizni boyitadi. Nutqimiz ravon bo'lishi, so'zlashuv qobiliyatimiz, ma'naviy saviyamiz barcha-barchasi, avvalo, ko'p o'qishimiz bilan bog'liq. Kuni kecha maktabimizda «Kamolot» va «Kamalak» tashkilotlari tashabbusi bilan «Shoirilar bolalarga» tadbiri o'tkazildi. Maktab rahbariyati, tajribali ustozlar, sardorlar kengashi bosh-qosh bo'lgan bu tadbirning asosiy maqsadi, o'quvchilarda kitobga bo'lgan mehrni yanada oshirishdan iborat edi. Tadbirga tashrif buyurishgan taniqli bolalar shoiri Abdurahmon Akbar, Qutbi Nosirova va «Tong yulduzi» gazetasi ijodkorlarini bolajonlar shodu xurramlik bilan qarshi olishdi. Ular o'quvchilarni qiziqtirgan barcha savollarga javob berishib, o'zlarining ijodlaridan namunalar o'qib berishdi. Qizg'in bahs-munozaralar, o'quvchilarning rang-barang chiqishlari, yodlagan she'rlarini ifodali o'qishlari, yangragan kuy-qo'shiqlar yig'ilganlarda katta taassurot qoldirdi. Tadbir so'ngida bolajonlarga «Tong yulduzi» gazetasining yangi sonlari tarqatildi. Maktabimizda iqtidorli o'quvchilar ko'pchilikni tashkil etadi. Ularning yozgan maqolalari, she'rlari, turli boshqotirmalari sevimli gazetamiz «Tong yulduzi» sahifalarida tez-tez chop etilib turiladi. Ana shunday shoirilar, yozuvchilar bilan suhbatlar uyushtirilib, qiziqarli tadbirlar o'tkazilsa, nur ustiga a'lo nur bo'lardi.

Muyassar IBROHIMOVA,
Toshkent shahar, Akmal Ikromov tumanidagi 228-maktabning 8- «G» sinf o'quvchisi.

AYNI BAHOR CHOG'IDA

Tomchilaydi sumalak,
Tovlanadi kamalak.

Bosh ko'tarar boychechak,
Dunyo go'yo kelinchak.

Qumursqalar uyg'onar,
Qushlar ham qo'shiq aytar.

Tezroq kelaqol, bahor,
Qilma bizni intizor.

Yurtimda bo'lar bayram,
Nurga to'lar keng olam.

Chiroy ochib gulsanam,

Kirib kelar Navro'z ham,

Tengdoshingiz ijodi

Baland uchadi varrak,
Yayraydi butun elim.


Ayni bahor chog'ida,
Shodlikka to'lar dilim.

Binafsha - kulgan ko'zim,
Navro'z mening rizq-ro'zim.

Chiroy ochar gulzorim,
Tinmas sira alyorim.

Gulnoza ALIQULOVA,
Toshkent shahar, M. Ulug'bek tumanidagi
241-maktabning 7- «B» sinf o'quvchisi.

TADBIRKOR AMAKILARIMIZDAN XURSANDMIZ



Maktabimizda juda ko'p to'garaklar bor. O'rtolarim futbol, basketbol, shaxmat- shashka to'garaklariga qatnaydilar. Ikki yildan buyon men ham boks bilan shug'ullanyapman. Murabbiyim Rustam Yo'ldoshevdan charm qo'lgopda jang qilish sirlarini o'rganyapman. Niyatim - doimo g'alabaga erishish. Sport bilan do'stlashgan bola sira kasal bo'lmas ekan. Buni o'zimda sinab ko'ryapman. Sportning yana bir ibratli tomoni borki, chempion bo'laman

degan bola, ichmasligi, chekmasligi, mashqlardan zerikmasligi kerak. Viloyatimizdan chiqqan yosh sportchilarni oynai jahonda ko'rsatib qolishsa, rosayam xursand bo'lib ketaman. Men ham ulardek Respublika musobaqalarida qatnashishni, chet ellarga chiqib, yurt bayrog'ini baland ko'tarishni orzu qilaman.

Sportchilar avvalo sog'lom, baquvvat bo'lishlari lozim. Shundagina ko'zlagan maqsadlariga erishadilar. Buni yaxshi bilgan tadbirkor amakilarimiz Bo'ri Qorayev, Ibrohim Umarovlar bizni sut mahsulotlari bilan ta'minlab kelishmoqda. Yana-chi, ular maktabimizni ta'mirlab ham berishdi. Eng quvonarlisi, saxiy amakijonlarimiz bizga sport anjomlari olib berishdi. Sport musobaqalarimizga ham o'zlari homiylik qilishmoqda.

Asadullo IBODULLAYEV,

Qashqadaryo viloyati, Qarshi shahridagi 20- maktab o'quvchisi.

TUMANIMIZ
CHAMPIONI



Sportga havas bolalikdan uyg'onadi, deyishadi. Shu gap rost ekan. Dilshod Yusupov ham 9 yoshidan buyon maktabimizda ochilgan karate to'garagida muntazam shug'ullanib keladi. U M. G'afurov nomli shirkat xo'jaligidagi umumta'lim maktabining 6-maxsus sinfi o'quvchisi. Izlanuvchanligi, tirishqoqliligi bilan murabbiylari nazariga tushgan Dilshod hozirgacha ko'plab musobaqalarda qatnashib, faxrli o'rnlarni egallab kelyapti. 2003 yilda Andijonda bo'lib o'tgan «Oltin vodiy» kubogida, tuman, viloyat va O'zbekiston chempionatlarida qatnashib, oltin, kumush, bronza medallarini qo'lga kiritdi. Sport dangasalikni yoqtirmaydi. Erta turib, badantarbiya mashg'ulotlarini bajarishga odatlangan Dilshod buni yaxshi biladi. Shuning uchun ham uni doimo sport zalidan topasiz. Murabbiyi Ravshan aka Jaloliddinovdan karate usullarini sabot bilan o'rganayotgan qora belbog' sohibi tengdoshimiz Dilshodjon bilan biz ham faxrlanamiz.

Saida MASHRAPOVA,

*Toshkent viloyati, Toshkent tumanidagi
4- maktabning 9- «A» sinf o'quvchisi.*



*Bo'y-bastimdan qoniqmayman,
Hali quvvatim kamroq.*

Kuchsizlarni


XAFA QILMANG,

Qonun bizniki, o'rtoq

BOYQOZON SPORT KLUBIDA

Yaqinda yashillikka burkangan go'zal Parkentimizda yana bir sport musobaqasi bo'lib o'tdi. Boyqozon qishloq sport klubida o'tkazilgan ushbu musobaqada yosh sportchilar sportning o'ndan ortiq turlari bo'yiicha o'zaro bellashdilar. Murosasiz bahslarda ular kelajakda tumanimiz sharafini himoya eta oladigan umidli sportchilar bo'lib yetishayotganlarini isbotladilar. Bunday turnirlarni tomosha qilish bizni ham sportga mehrimizni oshirmoqda. Tengdoshlarimiz mahoratini, yengil, epchil harakatlarini kuzatar ekanman, ularga astoydil havas qildim. Endi men ham sport bilan muntazam shug'ullanaman.

Ispaniya futbolida «Real» ning bugungi kundagi tirik timsoliga aylangan Raul o'zining futboldagi faoliyatini Madridda yakunlaydiganga o'xshab turibdi. Futbol muxlislariga yaxshi ma'lumki, Ispaniya futbolida hozir undan mashhurroq o'yinchi yo'q.



RAUL GANSALES BLANKO

O'zim ham futbolning ashaddiy ishqibozi bo'lganligim sababli tengdoshlarimga ushbu futbolchining bolalik yillari haqida so'zlab bermoqchiman.

Raul 1977 yilning 27 -iyunida Ispaniya poytaxti Madridning San Kiristabal de Los Anxelosda tug'ilgan. Uning otasi Pedro elektr ustasi, onasi Izabella esa uy bekasi edi. Raul oilada uchinchi farzand bo'lib, uning futbolga qiziqishi bolaligidan boshlangan edi. Ammo dunyoga mashhur futbolchi bo'lish uning xayoliga ham kelmagan ekan. U barcha fanlardan a'lo baholarga o'qir, darsdan bo'shadi deguncha do'stlari bilan to'p surardi.

Raul Gansales Blankoning katta futbolga kirib kelishi ham qiziq bo'lgan. U bolaligidan «Atletiko» jamoasiga a'zo bo'lishni orzu qilardi. «Atletiko» murabbiylari esa Raulni jismoniy zaif deb jamoaga qabul qilishmaydi. Lekin «Atletiko»ning azaliy raqibi bo'lmish «Real» jamoasi bu yosh futbolchini o'z safiga qo'shadi. Ko'p o'tmay, Raul «Real» ning asosiy tarkibidan joy oldi. Tez orada u terma jamoaga ham qabul qilindi. Terma jamoa tarkibida 67 marotaba maydonga tushib, rekord natijani qo'lga kiritdi. 37 bor raqiblar darvozasini ishg'ol etdi.

Shunday quvonchli kunlarda hayot unga yanada ajoyib tuhfa hadya etdi. 2000 yilning 25 iyunida u o'g'illi bo'ldi. O'g'lining ismini sevimli futbolchisi Xorxe Valdano sharafiga Xorxe deb qo'ydi.

Otabek NIYOZOV,

Poytaxtimizdagi 243- maktabning 9- sinf o'quvchisi.



DO'STIMGA

*Sog'lom tanda sog' aql,
Elda bor shunday naql.
Bo'lay desang salomat,
Kuchli hamda baquvvat.
Jismoniy mashqlar qil,
Tanangga to'lar quvvat.*

*Polvonlari bor elning,
Shashii ham baland bo'lar.
Alpomishlar ko'paysa,
Yer yuzi nurga to'lar.
Do'stim, shuni yodda tut,
Rozi bo'lsin sendan yurt.*

Normurod TOIROV,

Parkent tumanidagi 34- maktabning 9- sinf o'quvchisi.

YO'QOLGAN KITOB

Ibrat

Hammasi o'shandan, Muhammadali aka hali o'rta maktabning quyi sinflarida o'qib yurgan chog'laridan boshlangan... U uyidagi hamma kitoblarni o'qib chiqdi va ustozining maslahati bilan maktab kutubxonasiga a'zo bo'ldi. Kutubxonachi opaning ajoyib bir odati bor edi. Kitob olgan bola uni topshirishga kelganda,

o'qib chiqqan kitobining mazmunini so'zlab berishni talab qilardi. Bu esa hikoyamiz qahramoniga unchalik yoqmasdi. Chunki u kitob o'qishga o'qirdi-yu, so'zlab berishga biroz qiynalardi. Shundan cho'chib, olgan kitobini kutubxonaga vaqtida qaytarmay yuraverdi. Oradan ancha vaqt o'tib, kutubxonachi ularning uyiga keldi. Muhammadali uni ko'rgan zahoti o'zini panaga oldi. Chunki kutubxonadan olgan kitobi yo'qolib ketgan edi-da. Shunda uning murg'ak qalbida maktab kutubxonasidan qarzdorlik hissi uyg'ondi...

Oradan bir-birini quvlab yillar o'tdi. Muhammadali Eshnazarov bolaligida orzulagandek «katta o'qishlarda» o'qib, bir ishning boshini tutdi. Hozirgi kunda Iqtisodiyot Universitetida katta o'qituvchi bo'lib ishlab kelyapti. Ikki nafar farzandning otasi. Shunday bo'lsa-da, bolaligidagi qarzdorlik hissi hamon qalbini tark etgani yo'q. Biror adibning, shoirning yangi kitobi nashrdan chiqsa, uni birinchilardan bo'lib o'qib chiqadi. So'ngra, undan imkon qadar sotib olib, o'zi tahsil olgan qadrdon maktabi - Surxondaryo viloyati, Denov tumanidagi Bobur nomli 9 - maktab kutubxonasiga sovg'a qiladi. Maqsadi - bolajonlar qalbida kitobga mehr uyg'otish, ular ma'naviyatini boyitishdir.

-Inson yoshligida nimaniki astoydil niyat qilsa, ijobat bo'lar ekan, -deydi Muhammadali aka.

Bolaligimda televizorga chiqqan taniqli yozuvchilar, shoirlar bilan tanishishni, ular suhbatidan bahramand bo'lishni orzu qilardim. Niyatimga yetdim. Erkin

Vohidov, Abdulla Oripov, Erkin A'zam, Usmon Azim, Muhammad Yusuf kabi ijodkorlar bilan hamsuhbat bo'lish baxtiga muyassar bo'ldim. Ularning yangi chiqqan kitoblaridan sotib olib, dastxat yozdiraman-da, qadrdon maktabimga jo'nataman. Bunday kitoblardan o'ttiz, qirqtalab sotib olayotganimni, mashinamda doimo ko'plab kitoblar bo'lishini ko'rgach, bu

odam «kitob savdosi» bilan shug'ullanarkan-da, deb o'ylagan tanishlarim ham bo'lgan...

Yaqinda sevimli shoirimiz Omon Matjon bilan tanishish baxtiga muyassar bo'ldim. U kishi mening maqsadimni anglagach: «Juda xayrli ishga qo'l uribsiz. Men sizga 100 dona badiiy kitob sovg'a qilaman. Ularni mening nomimdan o'quvchilarga yetkazing», dedilar.

O'qimishli, ziyoli insonlarning farzandlari ham ziyoga tashna bo'lisharkan. Muhammadali akaning poytaxtdagi 320-maktabda tahsil oladigan qizi Anora hamda o'g'li Anvarjonlarning ham kitobga mehri bo'lakcha. Dadasi keltirgan yangi kitoblarni talashib-tortishib o'qib chiqishadi. Chunki kattagina javondagi kitoblar orasida ular o'qimaganlari qolmagan-da. Tunov kuni Anora: -Dadajon, yangi kitoblaringizdan bizning maktabimiz kutubxonasiga ham sovg'a qiling, -deb qoldi. Uning gaplari otasining ko'nglini tog'dek ko'tardi. Demak, farzandlarining murg'ak qalblarida ham kitobxonlik urug'lari

nish urayotgan ekan. Endi yanada ko'proq kitob sotib olishiga to'g'ri keladi...

Muhammadali aka yumush, tashvishlari qanchalik ko'p bo'lmasin, farzandlari tarbiyasi uchun albatta fursat topadi. Ingliz tili, musiqa va sportning karate turi bilan muntazam shug'ullanib kelayotgan o'g'il-qizining kundaliklarini har kuni tekshirishni kanda qilmaydi. Ularning a'lo va yaxshi baholarini ko'rib, ich-ichidan quvonib qo'yadi. Axir ota-ona uchun farzandlari kamolini ko'rish, ularning yutuqlariga sherik bo'lishdan ortiqroq baxt bormi dunyoda?!

O'tgan yili otasi sovg'a qilgan fotoapparatda uncha-muncha rasm olishni mashq qilib yurgan Anora va Anvarjonni yaponiyalik mutaxassislar «O'zbekiston bolalari

fotoko'rgazmasi»ga taklif qilishdi. Ular yuzdan ziyod bolalarni bir hafta davomida Samarqand, Buxoro kabi turli shaharlarga olib borishdi. Borliqqa ular nigohi bilan boqishdi. Bolalar nimani lozim topsalar, shuni suratga tushirishdi. Ularning suratlaridan Yaponiyada katta fotoko'rgazma tashkil qilindi. Buni qarangi, shuncha bolalar orasida Anoraning olgan suratlari 1-o'ringa

loyiq topilib, unga sovg'a-salomlar yuborishibdi. Bu xushxabarni eshitgan ota-onaning holatini bir tasavvur qilib ko'ring-a...


Muhammadali akaning quvonchiga biz ham sherik bo'lgan holda, ular boshlagan xayrli ishlarga rivoj tiladik. Zero, tafakkurni tiniqlashtiruvchi, qalblarga ezgulik urug'ini sochuvchi kitob bilan do'stlashgan bola hayotda qoqilmaydi.

Feruza JALILOVA.

Birgalikda o'qiyamiz

С.МИРВАЛИЕВ

ЎЛМАС
УМАРБЕКОВ



Dadam ishdan kelib, qo'limga bir kitob tutqazdilar. Kitob mashhur adabiyotshunos olim Sobir Mirvaliyevning O'lmas Umarbekov haqida yozgan xotiranomalaridan iborat ekan. O'zi ixchamgina, 30 bet bo'lsa ham sermazmun kitob mening

**BEBAHO
ASARLAR**

diqqatimni tortdi. O'lmas Umarbekovning hayoti va ijodi, serqirra, sermazmun romanlari, hikoyalari haqida olimning mulohazalari batafsil berilib, bu fikrlar kishini mushohadaga chorlaydi. Men yaqingacha O'lmas Umarbekov haqida juda oz bilardim. Bu kitobni o'qib chiqqandan keyin ko'p narsalarni bilib oldim.

O'lmas Umarbekovday odamlar dunyoda kam bo'lsa kerak. Adib o'z hikoyalari oddiy xalqni, oddiy odamlarni, oddiy turmush tarzini shunday ochib berganki, bularni o'qib hayron qolasan kishi... Adib romanlarini, hikoyalarni o'qisangiz o'zgacha zavq olasiz, quvonasiz, o'ylaysiz, izlanasiz. Afsuski, taniqli adib, davlat arbobi O'lmas Umarbekov kam umr ko'rgan. Bo'lmasa qanday bebaho asarlar yaratilar edi-ya...

O'ylashingiz mumkin, sen tirmizakning bolacha fikrlarini bu, deb. Lekin hamma odamning o'ziga yarasha qarashlari bo'ladi-ku! Adib vafot etgan bo'lsalar-da, asarlari o'lmaydi, ular abadiy qoladi. Istagim: O'lmas Umarbekovday adiblar ko'payversin.

Davronbek ORIPOV,
Yunusobod tumanidagi
17-lingvistik
maktab-gimnaziyasining
7-sinf o'quvchisi.

PARVOZING QUTLUG' BO'LSIN!

SAMO SIRIN OCHGIM KELADI

Yuksaklarga uchgim keladi,
Osmonlarni quchgim keladi.
Parvoz qilib moviy ko'klarga,
Samo sirin ochgim keladi.

Vatanimni quchgim keladi,
Dasta gullar terгим keladi.
Men ham mehnat qilib, mehnatim,
Zavqin tuyib yurgim keladi.

Talpinaman, ey osmon, senga,
Ijodimga ilhom ber menga.
Yuksaklarga qilganча parvoz,
Sodiq farzand bo'lay VATANGa!

Marhabo ESHCHONOVA,

Xorazm viloyati, Urganch shahridagi 4-o'rta maktabning 10-sinf o'quvchisi.



Marhabo Eshchonova tahririyatimizga o'z orzulari, istaklari, mehr baytlari bitilgan she'rlarini yo'llabdi. Ushbu she'rlar yosh ijodkorning ilk mashqlari bo'lsa, ajab emas. Zero, mashhur yozuvchi va shoirlarimiz ham ana shunday mashqlar natijasida asta-sekin shakllanib, yuksak martabalarga erishganlar. Biz Marhaboning ijodiga baraka tilab, qalamlari bundan-da o'tkir bo'lishini istab qolamiz.

Oq yo'l senga, Marhabo!

Ustoz oq yol tilaydi

Fazilat Masharipova Xiva shahridagi Feruz nomli o'рта

FAZILATNING FAZILATI



maktabning sakkizinchi sinfida o'qiydi. Betakror qobiliyati, o'tkir zehni bilan tengdoshlari orasida ajralib turadi. Bu fazilatlar, ayniqsa, uning ijodga bo'lgan qiziqishi, mehr va ixlosida yaqqolroq seziladi. Endigina muchal yoshini qarshilagan

bo'lishiga qaramay, atrofga shoirona nigoh bilan sinchkov nazar tashlaydi, hayotiy xulosalar chiqarib, yangi tashbeh, iboralar topishga intiladi.

-Fazilatning his-hayajonga boy she'rlarini o'qib quvonaman,- deydi maktab rahbari, O'zbekiston xalq o'qituvchisi, «Feruz. Shoh va shoir» kitobi muallifi Davlatyor Rahimov. -Ulardagi mavzu rang-barangligi, ayniqsa, diyorimiz madhini zavq bilan qalamga olishga intilishi, izlanishlardan erinmasligi uning kelajagiga umid uyg'otadi.

Quyida Fazilatning yangi she'riy mashqlaridan namunalari o'qiydiz:

NAVRO'ZIM!

Yasharish, yashnatish,
Go'zallik fasli.
Navro'zim - iqbaldan
Darakdir asli.

Tonggacha qozonda
Qaynar sumalak.
Dasturxonni bezar,
Ko'k somsa, barak.

Elimning eng aziz
Bayrami Navro'z.
Umrimizning laziz
Xush dami Navro'z

SODIQ DO'ST

Uyimizning to'rida,
Turar kattakon javon.
Fursat topdim deguncha,
Oshiqaman u tomon.

Oilamiz boyligi,
Shu javonda mujassam.
Qator-qator kitoblar,
Menga sodiq do'st, hamdam

O'qib ularning barin,
Kuchimga qo'shilar kuch.
Kim kitobni sevmasa,
Hayoti ham bo'lar puch.

Bizning oilamiz ahil va inoq, chunki oilamizning boshi mehribon bobojonim Shoir Usmonxo'jayev har bir ishda bizlarga bosh-qosh bo'ladilar. Bu yil tabarruk 63 yoshni qarshilayotgan sevimli bobojonimning hayot va ijod yo'llari biz yoshlar uchun ibrat maktabidir. Ilk mehnat faoliyatini «G'afur G'ulom» nomidagi adabiyot va san'at nashriyotida boshlab avval



musahhix, so'ngra muharrir, redaksiya boshlig'i va nihoyat nashriyot rahbari vazifalarida ishlaganlar. O'z kasbining jonkuyari bobojonim «Yoshlik» nashriyatini tashkil etib, ijodiy faoliyatlarini rahbarlik vazifasida davom ettiradi. Samarqanddagi «Zarafshon» nashriyatini, Toshkentdagi ko'pgina ijodiy tashkilotlarni tashkil etishda qatnashganlar. «Jahon adabiyoti» jurnali, «Yulduzcha» nashriyoti faoliyatida ham o'z o'rinlari bor. Shoir bobom 40 yildan ziyod vaqt mobaynida O'zbekiston matbuotida

MENING BOBOM

«Gazeta va jurnallar» nashriyotlarida ijodiy ishlari bilan muntazam qatnashgan. Venger mumtoz adabiyotining ko'zga ko'ringan yozuvchisi Kolmon Miksatning «G'aroyib nikoh», Amerika klassik yozuvchisi Mark Tvenning «Yanki va qirol», «Artur ovsar», chex yozuvchilaridan Yan Ko'zakning «Laylak uyasi» romani, Yano'tchi Nashikning «Qora qush va muhabbat» va boshqa qardosh xalqlar yozuvchilarining qissa, hikoya va

romanlari tarjimasini kitobxonlarga taqdim etib, chet el adabiyotiga bo'lgan qiziqishlarini yanada oshirishga hissa qo'shib kelmoqdalar. Hozirda Abdulla Oripov, O'tkir Hoshimov, Ozod Sharafutdinov va boshqa shoir, yozuvchilar bilan ijodiy hamkorlikdalar. Bobom bundan tashqari 20 dan ortiq kinofilmlarni o'zbek tiliga o'girib, kinomuxlislarga yetkazganlar. Ular

nafaqat ijodda, balki jamoat ishlarida ham faoldirlar. Mana bir necha yildirki, mahalla oqsoqoli sifatida faoliyat ko'rsatib kelmoqdalar.

Men ham kelgusida bobojonim kabi el ardoqlagan inson bo'lishni orzu qilaman. Ularning hayot yo'llari biz - nabiralarga ibrat bo'la oladi.

Hilola USMONXO'JAYEVA,
Toshkent shahridagi
38 - maktabning
4- «B» sinf o'quvchisi.



Ulg'ayaman, qo'lda kitob,
Yo'l olaman maktabga.
Har bolaning huquqi bor
MAKTAB degan tartibga.

ARALASH TEST

1. O'zbekistondagi qaysi daryo qadimda «Obi turk» deb atalgan?

- A) Sirdaryo.
B) Zarafshon.
C) Chirchiq.

2. Mamlakatimizda birinchi raqamli tennischisi kim?

- A) I. To'laganova.
B) D. Xudoyorova.
C) M. Safin.

3. «Navro'znoma» ni kim yozgan?

- A) Sayfi Saroyi.
B) Gulxaniy.
C) Umar Hayyom.

4. Umumiy uchga ega bo'lgan ikki nurdan tashkil topgan geometrik shakl.

- A) Uchburchak.
B) Burchak.
C) Bissektrisa.

Tuzuvchi:
Iroda MUSURMONOVA.



ELIMIZGA YARASHAR BAYRAM

Ayol - muqaddas zot. Uning sha'niga qancha ta'rifu tavsiflar kam. 8-Mart Xalqaro xotin-qizlar kuni deb belgilab qo'yilgani yana ham yaxshi bo'lgan-singillarimizga gullar tutamiz, ular

Ona, opa-izzatda, biz xizmatda bo'lamiz. Toshkent viloyatining Zangiota tumanida o'tkazilgan «Ayol go'zalligi olamni bezar» mavzuidagi katta bayram tadbiri ham onajonlarimizni ulug'lashga bag'ishlandi.

Tadbirni tuman hokimi Akmal

Isaboyev samimiy tilaklar bilan ochib berdi. Kechaga taklif qilingan 170 nafar faxriy va faol ayollarga hokimlikning sovg'a-salomlari topshirildi. «Zulfiya» nomidagi Davlat mukofoti nomzodi Kamola Rixsiyevaning onalarga bag'ishlangan she'rlarini yig'ilganlar maroq bilan tinglashdi.

Shu kuni 7 nafar yuzdan oshgan onaxonlar hamda 14 nafar urush qatnashchilari holidan xabar olindi va ularga qimmatbaho sovg'alar ulashildi.

Bunday xayrli tadbirlar elimizga juda yarashadi.

Xolmurod TOSHMUHAMMEDOV.



Bordir yana bunday huquq:

**ESLASH,
OYLASH,
IJOD QILISH**

Xohlasang o'z asaringni
Boshqalarga sovg'a qilish.

